



TAPAK 8

**Nobel Peace Prize nominee
nung Thunberg densema lir**



TAPAK 3

**Lakhimpur nung SAI Training
Centre tasen ka lapoktsüogo**

VOL. XVIII NO. 108 (ADOK 108) DIMAPUR

TENTONÜ (MONDAY) TSÜKLAI (FEBRUARY) 01, 2021

₹ 5.00

COVID Nagaland: Nisung 4 dak putet

Dimapur, January 31 (TYO): Deobarnü Nagaland nung nisung 4 dak Covid-19 aliba putet aser parnok züngsema nisung ajak agi 12,094 kümogo. Tang nisung 56 anepaludar.

"Kohima nungi nisung 4 dak COVID-19 alibaji putet. Külen, taneptsü angur ajak agi 11,806 kümogo. Tanübo taneptsü angur ka danga maliasü" ta Health & Family Welfare Director, Dr. Denis Hangsing-i metetdaksü.

Nagaland nung COVID-19 puteter nisung 88 süogo saka nisung 10 bo tanga timtem ajanga

asü. Maneni, nisung 144 tanga state temi ogo, ta paisa ashi.

Nisung 12,094 rongnung Traced Contacts 4,989, armed forces personnel 4,671, tanga state tem nungi arur 1,861 aser Frontline Workers 573 lir, ta Dr Hangsing-isa ashi.

Tang anepalurtem rongnung nisung 7 dak shirangba yimya terara lir, saka nisung 47 dakbo shirangba yimya kecha mali, ta paisa shisem.

Nagaland nung COVID-19 alitsü akok ta temolung melemi bilemba sample 1,24,945 tendangogo.

Food Business Operators dang metetdaksür

Dimapur, January 31 (TYO): Nagaland nung FSSAI license mesüra Registration asütsüpur Food Business Operators-i online nung fscos.fssai.in ajanga inyaksü akok, ta Principal Director, Cum Directorate of Health & Family Welfare, Dr. Vizolie Z. Soukhrie-i metetdaksüogo.

Iba ya Food Safety & Standard Authority of India

(FSSAI) ajanga tuyuba ama lir. Maneni, Railways dena States/UTs ajaki January 1, 2021 sülen nungibo Treasury Challan ajanga fees agütsüba magizütsü, ta Dr. Vizolie-isa ashi.

Teyari aginürtemi pei pei Chief Medical Office nung Designated Officer/Food Safety Officer den ajuruteptsü akok, ta paisa metetdaksü.

Covid vaccine agiba sülen nisung asüba bushisüngdangtsü akhanger

New Delhi, January 31 (Agencies): Deobarnü India nung public health mongintemi Union Health Ministry dang Covid-19 vaccine agiba sülen healthcare aser frontline workers 11 asüba bushisüngdangtsü atema takhangba agütsüogo.

India nung novel coronavirus vaccine agiba sülen nisung 11 tashi süogo.

Union Health Ministry dangi shidi zülurtem rongnung mongin nisungtem- Malini Aisola, SP Kalantri aser T Jacob John nung dena lir.

"District mesüra state

ketdangsürtemi tasürtem shinga vaccine ajanga asüba masü ta ashir. Ajisüaka, district, state aser National Adverse Events Following Immunisation (AEFI) Committee temi nisungtem asüba atema bushisüngdangba osangtem mesayur" ta Union Health Ministry dangi züluba shidi nung shia lir.

"Shibai nisungtem asüba kuli bushisüngdang aser kechi koma inyak ta asüba osang ano yimjak nung memetdaksü. National committee-i nisungtem asüba kuli bushiteptsüla" ta parnokisa ashi.

Journalist apuba atema Congress-i BJP aitsür

New Delhi, January 31 (Agencies): Singhu arrtsü nung Deobarnü freelance journalist Mandeep Punia apuba atema Congress-i BJP-i aniba Centre aitsüogo.

"Ochi tsüburtemi dang ochishir osangbertem apur" ta Congress lennir Rahul Gandhi-i ashi.

Aluyimertemi arrtsülen lungkak aitba tesem nungi police-i Punia pur aoba indang video ka Rahul-i sayu.

Singhu nung aluyimertemi lungkak aitba tesem nung Punia-i police den yimya tamajung beshiba atema apu. Pa apuba sülen ken o ka benok aser pa anogo 14 nü tepuokdak ayutsü.

"Aluyimertemi lungkak aitba osang zülurtem apur, parnok

anema ken o tem benoker aser tesem aika nung internet shibangtsüogo" ta Congress general secretary Priyanka Gandhi Vadra-ia ashi.

"BJP sorkari aluyimertem ola nembangtsütsü meranger, saka parnok nembangtsütsü merangba ama ola tulu adoktsü" ta Priyanka-i ashi.

Congress chief spokesperson Randeep Surjewala-ia PM Modi dang BJP-i journalist anema ken o tem benokbaji aluyimertem anema inyakba mapa ka lir ta ashi.

"Lungkak aitba tesemtem nung mobile internet services shibangtsüba ajanga nenoki aluyimertemi lungkak aitba mazüoktetsü aser linük ola menembangtetsü" ta Randeep-isa ashi.

Tea Tribe arogo lennirtem arangshi



Assam aser Nagaland arrtsülen Tea Tribe arogotem nungi lennirtem arangshiba sentong nung shisalen sayurtem aser tadenertem külemi agiba noksa angur. (Nakachari, January 31)

Nakachari, January 31 (TYO): Assam aser Nagaland arrtsülen Tea Tribe arogotem nungi lennirtem indang sentong ka Assam Valley Baptist Mission (AVBM) Community Hall nung ayonga agiogo.

Anogo ananü sentong ya Jorhat district kübok Nakachari nung agi aser arogo lennir 60 tema aden.

Iba sentong ya AVBM aser Northeast Alliance for Leadership Education and Social Transformation (NEALEAST) yaritepa ayongzüük.

Sentong nung shisalen sayurtemji taoba DABA senior Pastor Rev. Dr. Nokjung, taoba DABA associate Pastor Rev. Maong Lemtur aser NEALEAST founder President Rev. Dr.

Takatemjen nungertem liasü.

Iba sentong nung Discipleship, Leadership aser Service with Mission sayu.

Sentong tembangdang tadener ajak nem training certificates agütsü, AVBM President-i anküp tepela o jembi aser Nakachari Ao Baptist Arogo Pastor T. Panger Jamir-i tenüngsang agüja sarasadem.

Tanü nungi public tesem aser service aika lapoktsür

New Delhi, January 31 (Agencies): Tesüiba ita pezü tsüngda India nung Covid-19 menatepba ajema akümba nung ajemdaker Home Ministry-i public tesemtem aser services talila lapoktsü melaogo.

Yaküm December ita nungi linük nung tayimtsütem 80% senzütsü tenzükögo aser tan ita nungi school aser college tem lapokogo. February 1, 2021 nungi ano talila maparen tenzüksütsü.

Domestic & international flights:

Ita ana tema shibangba sülen Centre-i May 25, 2020 nungi domestic flights senzütsü

mela aser December ita tashi nungibo 80% lapokogo.

Ajisüaka, international flights mesenzütsü noktangba ano magien lir. February 28 tashi international passenger flights shibangtsü mapang atsülangogo ta DGCA-i ashi. Yaküm July ita nungi DGCA-i linük ka shimteter tayimtsütem senzüdaksür. Linük 24 shimteta nung US, UK, UAE, Kenya, Bhutan aser France dena lir.

UK flights:

UK nung Covid-19 virus tapu tasen ka poktetba sülen tanga linüktem den külemi India-ia tayimtsütem shibanga

liasü. Centre-i iba osang angadangba sülen ano February 14 tashi teshimtet tayimtsütem dang senzütsü metetdaksüogo. Tang India aser UK tsüngda hopta shia tayimtsü 30 dang senzür.

Cinema halls:

Ministry of Home Affairs (MHA)-i February 1 nungi cinema halls 100% lapoktsü melaogo. Covid lockdown sülen yaküm October ita nungi cinema halls 50% lapoktsü temelaba agüja liasü. Ministry of Information & Broadcasting-i SOPs tasen kar metetdaksüba nung 6-feet tepila ayutsü aser tejak nembangtsü shia lir.

WHO teloki Covid-19 poktetdak bushir

Wuhan, January 31 (Agencies): World Health Organization-i aniba mongin telok kati COVID-19 tenzüköba bushisüngdang aser parnoki Deobarnü Huanan market semdangogo.

Huanan market ya Wuhan nung wholesale seafood centre lir aser iba nungi coronavirus tasenji adok ta bilemer.

Deobar anüngdang parnoki Huanan semdang aser iba mapang security kanga akangakanga liasü.

WHO mongintem arudang osangbenertemi parnok dang asüngdangba kecha melangzü.

Yaküm küm tetenzüklen nungi iba shishilembadaki

nisungtem meyoker. Iba ya meshibangdangbo stall balala lemsar, shi, ango aser aonsotsü tapu balala yoka liasü.

China ketdangsürtem aser state media-ibo iba shishilembadak nungi virus madok saka tanga linük ka nungi adok ta ashir.

Nisung pezü pneumonia tapu balaka agi shirang aser ibaji Huanan shishilembadak den sendaktepa lir ta bushiteta liasü. Iba sülen December 31, 2019 nü shishilembadak shibang aser January tatemlen tashi nungbo Wuhan yimti anogo 76 atema shibanga liasü.

Coronavirus tasenba adokba ya Huanan shishilembadak den

sendaktepa lir kechiyong iba tesem nungi mezüng tatalokbatem putet, ta mongin nisungtemi ashir.

Hopta ana Wuhan nung quarantine asüba sülen WHO nungi mongin teloki Wuhan nung laboratories, markets aser hospitals semdangtsü.

Parnoki osang balaka memetdaksü saka Huanan market aser Wuhan Institute of Virology semdangtsü sentong lir tabo shiogo.

China aser United States tsüngda obang meputep adoka raratepba ajanga WHO-i aniba teloki Wuhan semdangtsüba thinena aru. China-i coronavirus adokba osang miimshi ta United States-i aitsür.

Mokokchung aser Zunheboto nung IPPI sentong agiogo



(Noksa abelen) Imlong Place, Mokokchung nung January 31, 2021 nü Intensive Pulse Polio Immunization (IPPI) tenzükba sentong agidang SDO(C) Mokokchung, Dharam Raj IAS ajanga tila tanur ka nem Polio Drops agütsüba noksa nung angur. (Noksa achichi) Hito Sema, Additional Deputy Commissioner, Zunheboto ajanga January 31, 2021 nü Zunheboto nung mezüngbuba Polio Drops agütsüba mapang tangokba noksa nung angur.

Dimapur, Aenjeti/January 31 (TYO): Linük ajunga den külemi Mokokchung aser Zunheboto district nunga Intensive Pulse Polio Immunization (IPPI) sentong agiogo.

Mokokchung district nung tanur arishi küm 0-5 atema Intensive Pulse Polio Immunization ya January 31, 2021 nü agia liasü.

Mokokchung jila nung iba sentong ya Imlong Place nung SDO(C), Mokokchung, Dharam Raj IAS lia tenzüktsü aser paisa Polio Drops mezüngbuba agüja liasü.

Mokokchung district nung tanur arishi küm 0 nungi 5 tsünga alir 7082 nem iba mozü agütsüogo, ta DPO RCH & UPI, Dr. Ayangla Saku ajanga

sangdong ka nung ashi.

Maneni Zunheboto district nunga iba sentong ya January 31, 2021 nü CMO Office, Zunheboto nung tenzükba liasü.

Additional Deputy Commissioner, Zunheboto, Hito Sema ajanga iba sentong ya tenzüktsü aser mezüngbuba Polio drop ya pai agüja liasü.

Iba sentong tenzükba nung Vitoli, DPM menden liasü aser Dr. M. Nukshisangla Jamir, DPO (RCH & UIP), CMO, Zunheboto ajanga iba sentong indang teratet tongmelang agi ashi.

Sentong nung jembiba mapang ADC Hito Sema-i mozü agütsü koda tongtipang ta asüba indang jembiba aser anema alitsü asoshi asenok dak nungi tenzüktsüla, ta ayongzüik.

Medical department ajanga maparen balala inyakba nüburtem nem rajemdaktsütsü asoshi osangbener ka asütsüla, ta pai tsürabur aser health worker tem ayongzüik. Paisa health worker dang bendanga agütsü nendaka mapa inyaktsü ajungshi aser kinük ajungalen tetsükdaktsü lir, saka ibaji ajanga atsüngzüika maotsüla, ta ashi.

Vechulo Duolo, Pastor, Tenyimi Church Zunheboto ajanga Tsüngrem temoatsü jazüka sarasadem aser Valerie Kiba, BPM, Zunheboto Sadar ajanga tepela ankep o jembiba liasü.

Zunheboto nung arishi küm 0 nungi 5 tsünga tanur 8495 nem IPPI ya agütsütsü nükjidong nung iba mozü agütsütsü tesem 233 amenoka lir.

Tripura nung osangbener merenshi; AR jawan ka anema ken o benok

Agartala, Aenjeti/January 31 (Agencies): Anogo pezü tejakdang South Tripura district kübok Belonia tesem nung duty nung aliba osangbener ka merenshiba atema state police-i Assam Rifles jawan ka densemanisung ana anema ken o benok, ta ketdangsürtemi Deobarnü ashi.

Deobarnü indianexpress.com den jembiba mapang Tripura Police headquarters nungi officer kati ashiba agi, osangbener Ashok Dasgupta ya January 27 nü duty nung lia Sanju Nandi aser Assam Rifles züngsem Ranjan Nandi nati tim mesüi nokdang aser teka sangshi, ta osangbeneri ken o benoka liasü.

Ajisüaka osangbeneri sepai kinungtsü dak tim masüba mapa inyakba aser danga taitsüba ken

o tem state police ajanga benok. Iba ken o ya jawan-i ashishiba nung ajemdaker benoka liasü.

"Ken o anaprong bushisüngdangogo. Tang tashi shinga pua mali," ta police tanishiri ashi.

Dasgupta-i indianexpress.com dang ashiba agi, pa ya January 27 nü Satmura nung lenmang ka yangluba atema South Tripura indang district magistrate nem memorandum ka agütsüba indang osang abentsü aoba mapang jawan den tai tonglokja alisang nisungba tenati pa lenmang nokdang aser pa merenshi.

"Ranjan-i kü tejak nung atsüng aser yintong ka agi küdak azük. Yangji alirtem ni kumzüksü aruba mapang parnoki kü indang

phone aser DSLR (camera) rakzüik. Camera tang tashi magütsü lir," ta Dasgupta-i ashi.

Pa ya mezüngbo Belonia Hospital-i bener ao aser Govind Ballabh Panth (GBP) Hospital-i yok. Pa ya tang Hapania nung aliba Tripura Medical Hospital nung temang anepaluba mapang lir.

"Ni tang tera tajungba lir. Kü tekolak, teku aser tepok yirutsü. Ni duty nung lia parnoki züka merenshi. Iba ken o nung tang tashi shinga pua mali ta ni angazükogo," ta osangbeneri ashi.

Tripura nung tesüiba küm ana ser tesadang tsünga osangbener 18 dak tema timtem balala ajangshiba osang lir, aser iba atema lokti tentet balalai ola adoker.



HQ IGAR (North) kübok Assam Rifles, Dimapur Battalion ajanga January 30, 2021 nü Old Showuba, Dimapur nung aliba BBS Hostel nung career counseling lecture agüja liasü. Iba sentong nung lanurtemi Indian Armed Forces nung adentsü atema lenmangtem sayua linük yangerba nung shilem agütsü ajungmesoa liasü. Iba sentong nung lanur 150 shi arua shilem agia liasü.

Dimapur nung mejangjaba nisung tasü mang ka nguteta lir

Dimapur, Aenjeti/January 31 (TYO): Dimapur Railway station nung PRS Gate/FOB 2 anasa January 30, 2021 nü mejangjaba nisung tasü mang (tebur arishi küm 50 nungi 55 tsünga) ka nguteta lir.

Iba dak sendakba nung ozüng agi melaba ama teinyaktsü mera ajak agiogo aser nisungba ya shiranga asü südi, ta asadangteta lir. Iba sülen PM examination/

jangjatetsü atema tasü mang ya District Hospital Dimapur Morgue nung yua lir. Asürsang ya tula sentsü tenenya, T-shirt sentsü temesüng aser jean pant sentsü tanen den socks sentsü tanak agia liasü.

Kibur/kinunger/medemer temi Officer-in-Charge, GRPS, Dimapur den tongteprateptsü metetdaksür, ta sangdong ka ajanga ashi.

GPRN/NSCN ajanga asükhü lemsatep

Dimapur, Aenjeti/January 31 (TYO): Khurmi Region kübok Unopat yimtsüng nungi NSCN/GPRN indang Eitangiter Office nung Joint Secretary, Wango Renlee anojungi January 30, 2021 nü asüba atema Government of the People's Republic of Nagalim (GPRN) mang ayimer, ta NSCN/GPRN indang MIP sangdong ka ajanga ashi.

Pai dak aokshitsü makokba linük meimba molungsentsü dener tasünü tashi Naga lima tenzükogo. Pa asüba ajanga tawa adokdaktsüba kanga jangja metettsü aser asüngtsü

tasak asütsü. Pai agütsü mebilemi Naga lima atema khuret atenba atema pa tenüng Naga nung puti otsü nung zülüoka alitsü aser pai Naga lima atema inyaktsüba ajaki bilemtettsü, ta sangdong ajanga ashi.

Mangyim tia nung aliba asür Wango Renlee'er kinunger aser tembartem dangi NSCN/GPRN ajanga asükhü lemsateper aser parnok nem tashi tasen agüjang ta Tulusang Tsüngrem dang sarasademtsür. Asür tanüla teti tatem maka tesunep nung anisüngzüikjangma, ta NSCN/GPRN ajangasa ashi.



HQ IGAR (North) kübok Assam Rifles, Chieswema Battalion ajanga Kohima district kübok Chieswema tesem nung zünger alir lanirtem nem pre-recruitment training agüja liasü. Iba mapang parnoki lanur 17 dak sempet tajung ajeteta par 11 CAPF balala atema shimtet.

Assam sorkari Feb. 3 nü tesayur 30,000 nem mapa agütsütsü

Guwahati, Aenjeti/January 31 (Agencies): Election agütsü aliba Assam state nung sorkari otsü tasen ka yanglua February 5 nü nisung 30,000 nem mapa nung shimokba shiti agütsütsü.

Ibai mapa nung shimokba maparen tulutiba alitsü, ta Assam Education Minister, Himanta Buswa Sarma-i ashi.

Honibarnü state education department ajanga Guwahati nung tesayur 4,000 dak tema nem appointment letter tem lema agütsü.

"Guwahati nung aliba Sarusajai field nung tesayur 30,000 nem appointment tasen aser mapa nung regular kumtsüba indang appointment letter tem lema agütsütsü. 2013 küm anogo ka nung TET

qualified teacher 25,000 shi nem appointment letters agütsüba sülen ibai tulutiba alitsü. Iba tejen otsü ya yanglushitsü," ta Himanta-i ashi.

BJP-i aniba sorkar indang mezüng kümsük ya education department nung mapang talangka nungi bendena aruba ken o tem bentetba nung temolung agüja liasü, ta pai ashi.

Taruba sorkari kanga nungdaka aliba temelenshi bener arutsü atema temolung agütsütsü. Küm ka ken o balala jembiba aser education department den jembiteper tesayur 4,000 nem appointment letter agütsü, kechiaser 2001 küm Congress-i sorkar tentetba sülen parnok mapa nung shimokba ya ozüng alema lir, ta sangdonga aliasü.

Lakhimpur nung SAI Training Centre tasen ka lapoktsüogo



Lakhimpur nung Union Sports Minister Kiren Rijiju aser Assam Chief Minister Sarbananda Sonowal nati SAI Training Centre tasen lapoktsüdang agiba noksa angur.

Lakhimpur, January 31 (Agencies): Assam kübok Lakhimpur nung Union Sports Minister Kiren Rijiju den Assam Chief Minister Sarbananda Sonowal nati SAI Training Centre tasen ka lapoktsüogo.

Solal Gaon nung SAI Training Centre (STC) tasenji Honibarnü sayatsü.

STC nung weightlifting aser boxing asayartem anepalutsü. Iba nung hostel den multi-sports indoor hall ka alitsü.

STC hostel nung tetsür 70

litettsü aser teburtem day boarding basis nung amongstsü akok.

"North Lakhimpur nung SAI Training Centre ya tajung asütsü. Iba tesem nung saisaponger tajungtem yangi training agitsü. CM Sarbananda Sonowal lenisüba kübok Assam ya saisaponger tajungtem adokdak ka kümogo" ta Union Sports Minister Kiren Rijiju-i ashi.

Assam Chief Minister Sarbananda Sonowal-ia STC lapoktsüdang "Iba STC nung

training centre, athlete hostel aser multi sports indoor hall ajanga saisapongertem balaka anitettsü" ta ashi.

Iba sentong nung CM Sonowal-isa Fit India Fitness Protocol sayatsü.

Fit India Fitness Protocols ya ajak atema standardised protocols lir.

Chief Minister Sonowal aser Union Sports Minister Rijiju natisa North Lakhimpur College playground nung synthetic athletic track ka lapoktsü.

Assam nungi nisung ka küm 16 atema tepuokdaki yok

Imphal, January 31 (Agencies): Assam nungi tebur kati par kinunger jala, arishi küm 12 tain ka dak tashiyim agi shi nung medemba atema Honibarnü Manipur nung special court kati pa küm 16 tepuokdak ayutsü oshidang agütsüogo.

Osang angazükba agi, iba ken o dak sendakba nung POC SO Act, 2012 kübok pua alisang dang Rs 20,000 senchi achi. Iba nisung ya arishi küm

39 tain Babul Kol ta jangjaogo. Tebursang aser tanur tetsür naprong Cachar district kübok Silchar nung alir.

Manipur Police-i ashiba agi, Ukhrul district nung 2016 March ita nungi pua alisang yagi tetsürla dak tashiyim mapa inyaka aru.

Tetsürla ya Babul'er kinunger lir, la ya 2015 küm October ita Silchar nungi Ukhrul-i anir ao. Iba sülen, Ukhrul nung la class 3 nung

züngdaksü.

Ukhrul nung woman police station nung tetsürlai la dak ajangshiba/atalokba tem shia FIR ka benokba sülen, Babul Kol anema POC SO Act 2012 kübok police-i ken o ka benok.

Iba dak sendakba nung bushisüngdaba sülen, police-i Babul anema court nung chargesheet ka agütsü aser Honibarnü court ajanga pa küm 16 tashi tepuokdak ayutsü obendang agütsü.

Assam State Commission for Women indang website saya

Guwahati, January 31 (Agencies): Nübor timba atongtsü nükjidong nung Assam State Commission for Women (ASCW)-i official website ka sayaogo.

Social welfare department nung principal secretary, Mukesh C Sahu-i iba website tasen sayatsü. Iba sentong nung ASCW chairperson Chikimiki Talukdar, member secretary Cauvery Barkakati Sharma aser tanga board züngsemtem aden.

Iba website tasen ajanga timtem ajuruba tetsür mashii kati tesem mashii ka nungi

online ajanga ken o benoktsü akok.

"Iba inyakyim ajanga tetsür nem mapang shitak nung temeten agütsütettsü" ta ASCW-i sangdong ka nung metetdaksü.

'Online Complaint Lodging System' dak alia iba website nung ASCW indang osang aser temetettsütem lemsateptsü.

"Tanü ya ASCW atema tongtipang anogo ka lir. Digital media aser social media sabangtem nung shilem agiba ajanga ASCW-i tetsür timba yaritettsü" ta principal secretary Sahu-i ashi.

"Assam State Commission for Women indang official website sayaba nung nia shilem agiba atema kanga pelar. Iba ajanga Assam kübok kinük ajak atongtsü imlar" ta ASCW chairperson Talukdar-ia ashi.

Deobarnü ASCW-isa Facebook aser Twitter account tem lapoka social media sabang nung ajemokogo.

"ASCW indang website, Facebook page aser Twitter handle ajak ya Guwahati nung amenoka aliba web design company Prag Asomi ajanga yanglutsüba lir" ta ASCW-isa metetdaksü.

BJP-i Assam nung telongjem raksatsür: Congress

Guwahati, January 31 (Agencies): Assam nung opposition telok Congress-i ano tang State yimsü süa aliba BJP inyakyim aitsüogo.

BJP yagi Assam indang telongjem raksatsür ta Congress-i aitsü.

"Assam nung nüburtem tsüngda yimjiyimjung aser tesendaktep raksatsütsüsa, latettsüba mapang dak alia BJP-i inyaka arudar," ta Honibarnü Guwahati nung All India Congress Committee (AICC) spokesperson, Gourav Vallabh-i ashi.

"Saffron telok (BJP) yagi Assam nung tesüiba küm pungo nungi tenzüka yimsü süa aruba mapang voter tem mashileni anitsü atema lokti nung telemsa adokdaksüogo," ta Gourav Vallabh-i temulung melemlimsatep.

Assam ya Vaishnav saint Srimanta Sankardeva, shibai lokti nung ajak nem maongka kasa agütsütsü asoshi osang prok, pa aliba tesem ka asünung, Assam nung terenlok maparen

madak ajemdaker BJP asüküma arur, saka atangji nungbo iba ya khenyongi balala lir, ta Gourav Vallabh-i ashi.

BJP-i yimsü asüba/aniba Assam Sorkar dang "double-engine" sorkar" ya "double-CM Sorkar ka lir aser anaprongla ya mashileni odar, ta Congress-i aitsü.

Congresa-isa "State aser UTs 36 longjemer, Business Reform Action Plan Results 2019 nung Assam rank 20buba nung lir, koba Assam BJP sorkar ajanga achaayanga inyakba kecha mali," ta ashi.

"Home Affairs nung Department - Related Parliamentary Standing Committee indang 227buba Report nung shia aliba agi, North East Industrial Development Scheme kübok 2019-20 küm Assam atema 33 paise per capita (Sen cr. 1) dang melaa aser 2019 küm, linük nung large industrial unit amenokba/tenzüka nung Assam shilem 0.73 dang liasü," ta Congress-i shisem.



Assam health minister Himanta Biswa Sarma-i Sivasagar district nung Me-Dam-Me-Phi benjung nung shilem agiba angur. Me-Dam-Me-Phi ya Tai Ahom nung indang tongtipang benjung ka lir. (Sivasagar, January 31)

Aizawl nungi Assam Rifles teseptem belentsü: Zoramthanga

Aizawl, January 31 (Agencies): Aizawl nung Assam Rifles teseptem kobi melii tangaleni belentsü ta Mizoram chief minister Zoramthanga-i metetdaksü.

Assam Rifles ketdangpurtem dang parnok indang teseptem Aizawl nungi Zokhawsang-i belentsü atema shiogo. Taküm February ita tsüngda iba tesem jagi belentsü, ta Zoramthanga-i ashi.

State ali nung amenoka aliba armed force ajak tanga tesemtemi belentsü, ta paia ashi.

"Iba onük atema ni Prime

Minister Narendra Modi aser Union home minister Amit Shah na den ajurutepogo," ta chief minister-isa shisem.

Mizoram nung Assam Rifles battalions asem amenoka lir.

Lunglei nung 1st Assam Rifles, Serchhip nung 8th Assam Rifles aser Aizawl kübok Zodin o Khatla nung 46 Assam Rifles teseptem lir.

February 19, 2019 nü Union home ministry-i Assam Rifles dang Aizawl nungi kilometer 15 shi pilar aliba Zokhawsang-i teseptem benlentsü tetuyuba agüja liasü.

Tripura nung BJP lennir ka adianu khaset

Agartala, January 31 (Agencies): Tripura nung BJP lennir ka adianu tepset aser iba ya yimtenren tasa ka lir ta BJP-i ashir.

Iba dak sendakba nung police-i nisung 3 pua lir.

Tasüsangji Kripa Ranjan Chakma ta jangjaogo aser Honibarnep yakta pa khaset.

Kripa ya Mahatya Ranjan Chakma tenu liasü. BJP indang Chawmanu Mandal Committee nung Mahatya ya general secretary inyaker.

Kripa ya Jalachara nung telidak liasü aser par kidang

mejanga lia khaset.

"Onoki iba ken o atema nisung asem- Braja Mohan Chakma, Hemanta Chakma aser Uttar Kumar Chakma nungertem puogo" ta Manikpur police station-i ashi.

Kripa tepsetertem aputsü atema police-i lisopur aliba tesemtem nung mita odar, ta police-isa metetdaksü.

Tripura Tribal Areas Autonomous District Council (TTAADC) indang election agitsü aliba jakdang iba yimtenren tasa atonga inyaker, ta BJP-i shiogo.



Manipur chief minister N Biren Singh-i Imphal nung Nambul ayong kümzüka ayutsü atema mapa inyakba reprangdangogo. Manipur sorkari 2019 küm 'Rejuvenation and Conservation of Nambul River' project tenzüka liasü. Central Pollution Control Board ajanga Manipur nung ayong temenentiba rongnung Nambul ya ka lir ta shiogo.



TIR YIMYIM

YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 01, 2021

SORKAR DAK MELUNG MALEMER

- Tangsen Lemtur

Yaküm November ita nungi tenzüka tang tashi linük nung aluyimertem jenti Delhi arrtsülen adenshia sorkari benokba aluyimba ozüing tasen asem anema maneni longkak aitba ya tanga kecha masü saka aluyimertemi sorkar dak melung malemba agi lir. Centre sorkari aluyimertem dang, aluyimba ozüing tasen asem ya ajanga aluyimertem kanga tajangzük angutsü ta aiben metetdakja arur, ajisüaka aluyimertemi sorkari ashibaji mamanger aser sorkar dak melung malemer, ibayongji aluyimertemi ozüing tasen asempronglaji agientsü akhanger. Aluyimertemi sorkar dak melung melemtetbaji odangbo masü südi. Sorkari mapang talangka nungi aluyimertem sendoker ta aluyimertemi bilemer, anungji parnok melung koktetsüsa sorkari inyaksüla. Ato kilonser, Narendra Modi-i ashiba ama item ozüing ya aluyimertem tajangzük angutsü atema süra aluyimertem dang masü saka nüburtem-a memeteti ajangzüksü, saka pai jembiba oji aluyimertemi mamanger. Sorkari ozüing asem ya magientsü tebilemba nung tekong merangra aser aluyimertemia tekong meranga item ozüing agientsü takhangba agütsüra Republic Day nü lendong atalokba dang nungi tamajungba ataloktsü menoa mali. Aluyimertemi, item ozüing ajanga MSP aser Mandi system anentsüa akok aser item ozüing ajanga parnok masü saka corporates kar dang tajangzük angutsü ta tsübur. Tang Parliament Budget senden nunga sorkar aser opposition na tsüngda aluyimertem longkak aitba onük nung mangatettep tulu adoktsüa akok ta bilemer. Opposition party temi aluyimertemi longkak aitba pusema ozüing tasen asemprong ya ya agienang ta akhangtsü. Taoba Parliament nung aluyimba ozüing tasen asem nung o junga melemtepi ozüing asemprong ya agizüka liasü. Sorkari tanga party tem, mongintem mesüra aluyimer lenirtem den shisa melemsatepi iba ozüing benoka agizük, aser tan Parliament nunga kasa onük nung mangatettep adoktsü. Budget senden tenzüka Parliament House anaprong külem senden nung linük Tiri jembiba mapang nung aluyimertem pusema opposition party 20-i senden nung maden. Parliament House anaprong külem senden nung Tir, Ram Nath Kovind-i, Supreme Court-i tuyuba ama sorkari aluyimba ozüngtem soita atatsü aser Supreme Court-i kechi obendang agütsüdir sorkari akhümtsüba agizüksü, ta metetdaktsüogo. Opposition party temi koba tashika aluyimba ozüngtem anema ola adokdir adokaka kecha mesütettsüa akok, kechiyong Parliament House anaprong nung sorkar züngsem timba lir. Oppositon-i sorkar anema kecha meinyaktettsüa akok, ajisüaka India linük atema 'tongtoret' ta züngshiba nütsüng shilem 58 (aluyimertem) jagi sorkar anema apusora sorkari metizüksü. Sorkar sentongjibo tajung asütsüa akok aser sorkari ashiba ama, atangji aluyimba ozüing tasen asemprong jagi aluyimertem tajangzük angutsüa akok, saka aluyimertemi melung malemer, anungji aluyimertem melung akoktsüsa sorkari inyaksüla mesüra ozüing asempronglaji agien tajungba asütsü.

OLEMSABANG

SOBALIBAI KHRISTAN TAMANG AKANGSHIDAKTSÜBA

~ Wati Longchar (Serampore)

(Yashi adok nungi...)

Kuli kar:

- Putu ka nung temesüng nungeri (Japan nungeria dena) alima agiyonga oa parnok yimsüsüba küboki anir ait. Parnoki parnok sobalibaji jenjang temaba, tajungba aser ochi ta angateta, tashiyim amshia lisopur tetsü oshi mejembidaktsü, nüngja-koja melen, tenünga pei oshi nung ajatsü memela aser sobaliba mebenshidaktsü aser benjong-bentsü memongdaktsü. Yamaji tashiyim amshia sobaliba aika samaa odaktsü.
- Lisopur mulungsentsü melenshidaktsüba, tat. agi., temesüng nunger rakmokeri (colonizer) bener aruba sobaliba ya temaba, tajungba, parnoki benshiba sobalibaji dang shitak; tanga sobalibatem mojing mapatem ta angatetdaktsüba ajanga tsüraburtemi/taintemi lanu putu dang tim mesayuba ajanga sama aor. Lanurtemia angazüksü mejangra.
- Tanü putu rongsenketsüng maparen renloka aoba den par kintem sobaliba ajizüka ao. Mass media balala, shishilembaba mapa balala ajanga lanurtemi American, European, Korean, Japanese lifestyle ajizükba aser yamaji alitsü merangba ajanga pei sobaliba samaba angur.
- Tamangbai metenja, pei sobaliba mamshitsüla, tai, mojing mapatem ta aija sendokba ajanga sobaliba tajung aika samar.
- Technology den teyangluteter sobaliba atener. Aben-süoshi, achi-ajemba, oset-tsüset kechi südir süang, yangi teyangluteter sobalibaji talirtemia benshitsüsa akümer. Talisa information technology ajanga alima rangben yimtsüng ka ama akümba putu teyangluteter kin sobaliba nungoka aitba ajanga rongsenketzung nung tajemba shilu sobaliba samaa aor. Rongsen meimba sobaliba (materialistic culture), pei asoshi dang bilemba (individualistic culture), tantsür, tambur, sensaker hau ta maliba sobaliba nungoka aitba putu ka nung lir.

Shir sobaliba südir süang ajakbo tabensa masü. Meimchir lokti ka rajang kümdaktsütsü sobaliba tentet aika dang lir. Ano sobaliba nung ibai temaba, tajungba, aser tangari benshibaji temenen ta aitsüba tim masü. Sobaliba balala aika alibaji khuret ka, tali benja-beno tali adoktsür, tamakitsü ta masü, temoatsü amai angateta wazüka ayutsüla. Sobaliba balala aika aliba ajanga alima tubor tajungba aser takaba kümdaktsür. Anungji sobaliba tajungtem Yisu Khrista tesayuba ochi dak ajemdaker nüburtem tejakleni odaktsütsü asoshi Khristan tesayuba tetezü tasen agütsür amshitsüla.

Sobaliba ajanga Tamang Akangshidaktsüba

Sobaliba kaji meimchir aser temeketep (natural environment) tesendaktep ajanga adoktsür. Tat. agi., Pacific Island country aika tzüym (ocean) agi meketpanger alir asü nung tzüym (ocean) dak sentakba ken-o, otsü aika angutsü. Naga lima tzüym maka (ashiko yimtaklir aikati tzüymji koma mongudangi alitsü) anungji tzüym dak sentakba sobaliba mali. Alinük karbo lisem lima (desert) dang, yangji tzü, rem lanu, san (sheep) amala tangatetba balala. Lisem lima nung alir aser Nagaland ama nung tzüngküm pezü lir saka lisem lima mali, anungji tangatetba balala asür. Aor tar nunger lipok otsü nung amman-sangwa koda asütsü ta mungdang akadang Impang ozüi "mangli-sangwali ta süang" ta ashiba ya Naga lima den kanga tapet, saka North aser South hemisphere nungbo mapet kechiaser asükwa nungbo ita junga anü madoker, amman dang alir, saka lemluwa (summer) nungbo anü mair, tesangwa dang alir (Parnok asoshiba pokpo-i ashiba to tapetba). Laishiba nung auo (bamboo), mamazü (papaya), naspati, naring amala zülua mangutsü kechiaser itemji Middle East lima nung bulua mangur. Ak shi ya Naga nunger asoshi No.1. saka Laishiba nungbo tesempatsü shiruru, temenen shiruru amai zülua angutsü. Yamaji shilu balalai sobalibaji yanglur aser amshir. Meimchir shilu balalai sobaliba tapu "balala" aika benshir. "Balala" ya tetsübut? amai angatetba ya tai, saka jangratemtsü aser temoatsü amai angatettsüla. `Balala' ali nung dang tangazükba angur. Kasa dang asü nungbo shisatsü merenloker.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Manipur, January 31, 2021: Amongnü Manipur kübok Shangshak yimdak Tangkhul Naga nunger sobaliba sübotsü sübor tekülem sentong nung adenba sülen sentep senshidang tangokba noksa nung angur. Naga nunger yim aika tenem nung amenoka lir; akhidang tsüraburtemi tsükchir aruba angutsü atema yimtsüngtem tenem nung amenoka liasü.

Madhya Pradesh nung tribal Khristan tem anema inyaktenzükogo

January 31, 2021: Union of Catholic Asian News (UCAN)-i ashiba agi, India kübok Madhya Pradesh nung Hindu yimsü alia amangertemi Khristan tem anema mapatong tenzükogo; parnoki yimdaklirtem dang Khristan tem den tesendaktep kecha mayutsü tuyuba den külemi Khristan tem danga Hindu yimsü dangi meyiptsüla, ta shia amokmerener.

January 26, 2021 nü Jhabua District kübok yimdak yimsüsürtem den senden ka amenba mapang nung Hindu nationalist lenir, Kamallesh Malviya-i, "Lisopurtemi tamangba yimsü memeyiptsüla

asertaneptsüba meshia sarasadem masütsüla. Iba denji külemi Khristan yimsü dangi meyipertem den kecha tesendaktep mayutsüla," ta metetdaksü.

Iba dak alia Jhabua district tesem ajungalen Hindu nationalist temi Khristan tem dang, nenok loktiliba nung mesendokdaksünöra Hindu yimsü dangi meyiptsüla ta sangdonger.

January 11 nüa Jhabua yimti nung Hindu nationalist temi tribal tesem ajak nung Tenla kitem shibangtsütsüla, ta takhangba agüja yimdong süa longkak aita liasü.

Parnoki district collector nem temepishiba shidi ka agütsüba den külemi taruba anogo 30 tsüngda telangzüba tajung magütsüra rara adoktsü, ta amokmerenogo.

UCAN-i ashiba agi, tang Jhabua district nung Khristan nütsüng shilem 4 shi lir.

UCAN den jembidang Khristan lenir kati, "Reshikangshi aser amokmeren liaka onoki pei tamangba yimsü (Khristan yimsü) benshir. Reshikangshi liaka right-wing Hindu teloktem tebilembaji onoki matalokdaksütsü; onoki Khristan yimsü medoktsütsü," ta ashi.

Covid wara mapang linükaika nung pei tamang jenjang asentenshi

January 31, 2021: Coronavirus wara ajanga US, Spain aser Italy linüktem densema linük 14 nung nüburtem tamang jenjang kongshiogo, aser tamang jenjang tamajungba akümba linükji South Korea linük lir ta survey ka ajanga bushitetogo.

Iba survey nung nisung 14,000 dak temai shilem agia liasü.

Alima nung coronavirus wara poktetba sülen linük aika nung Tenla kitem shibangba mapang nung nisung aika tamang jenjang tajung akümba Pew Research Center study ka ajanga bushitet.

Covid wara mapang nung rongsenkettsüng jenjang junga aliba linük 14 nung iba survey agia liasü; linük 14 ji Australia, Belgium, Canada, Denmark, France, Germany, Italy, Japan, Netherlands, Spain, South Korea, Sweden, United Kingdom aser United States lir.

Pew Researchers-i, "Survey agiba linük 14 nungjagi linük 11 nung nisung timbakati wara mapang nung parnok tamang jenjang tashi taitba kümogo, ta ashi. Ajisüaka terenlok aliba linüktem aika nung nisung aikati covid wara ajanga pei tamang jenjang nung temelenshi maliasü ta ashi," ta metetdaksü.

Wara mapang nung pei

tamang jenjang tajungba kümogo, ta telangzüba agütsür timbaji US nungi liasü aser pei tamang jenjang tamajungba aküm, ta telangzüba agütsür timbaka South Korea nungi liasü.

Wara mapang nung pei tamang jenjang tajungba akümer timtibaji (shilem 28) US lir, iba sülen tanabuba jenjang nung Spain (shilem 16), tasembuba jenjang nung Italy (shilem 15) lir. Iba sülen Canada (shilem 13), Australia, United Kingdom, France aser South Korea linüktem (ajak shilem 10) jenjang pezübuba nung lir.

Coronavirus wara nokdangtsü atema Tenla kitem shibanga liasü, ajisüaka online ajanga Khrista osangtajung lemsatepba ajanga nisung aika taküm nung kongshiogo.

Ano külen wara mapang nung pei tamang jenjang tamajungba aküm, ta telangzüba agütsür timtibaji South Korea nunger liasü (shilem 9). Iba sülen Spain (shilem 5), America, British, Belgium aser Netherlands linük shia shilem pezü (4%) liasü.

Telangzüba agütsür aikati pei taküm nung tamangba yimsü ya kanga tongtibang ta ashi, aser parnok rongnungi aikati wara mapang nung pei tamang jenjang tashi taitba kümogo ta

langzü.

Pei taküm nung tamangba yimsü kanga tongtibang, ta langzür South Korea nunger rongnungji shilem 14-i wara mapang nung pei tamang jenjang tashi maitba kümogo, ta ashi.

Pew Research survey ajanga ashiba agi, survey nung shilem agirtem rongnung tetsür o tebur na tsüngda telangzüba kasa shi dang liasü, saka Italy aser South Korea na nungbo tetsür aser tebur na tsüngda telangzüba balala agütsüba nung ongdang liasü. Italy nung tetsür shilem 20-i pei tamang jenjang tashi taitba kümogo ta ashi saka teburtembo shilem 10-i dang kasa telangzübaji agütsü. South Korea nunga tetsür shilem 13-i pei tamang jenjang tajungba kümogo ta ashi saka teburtemi shilem 8-i dang kasa telangzübaji agüja liasü.

Yaküm June 10 nungi August 3 tsüngda Pew Research Center-i phone ajanga linük 14 nung iba survey agi, aser iba survey nung tain 14,276-i shilem agia liasü.

Iba survey tenzükba mapang nung Australia, Japan aser United States nung coronavirus wara kanga bulua proka liasü aser Italy densema Europe nung aliba linük kar nungbo iba wara prokba ajema küma liasü.

ANO GO ABEN TSÜNGREM DEN

Sannüker nungi tesünep T. Ken 23:4

Tsüngrem chir ka ama na kodanga kija masü! Mapang ajak nung ne Sannüker ne den lir. Tia ajak nung Pa ajatsü mali. Pa kong lir ta na süngmangtsü mali. Mapa tasak adokdang, Pai na toktsütsü ta kodanga bilema teli. Pa ne jakdang aor; Pa na anasa jajar; Pa ne sülen arur. Pai na awabanga kümzüker. Pai alushijak shia metetta aliba ama, aser ne kolak nung ku ajak züngtetta aliba ama, Pai na maneni anüker (Luke 12:6-7). Nai Pa munguaka, Pai Pa tenük teti ne dak ayur. Tejashi mapang Pa atenba agi Pai na süneptsür. Pai na tasü akhüm lenden ajanga anir. Nüngdak makaba nung nai aginüba ama Pai lenden meküta manir. Kodang na ammag lenden ajanga anitsü ne Sannükeri mapangji metetta lir.

Aji saka item mapang nung Pa na anasa jajatsü, jajaba tepiyong Pai na meimer aser ne den lir ta jangjadaktsür. Iba mapang nai Pa temeim tarokba angatettsü.

Na tamajungba tsübuttsü kodanga menüngdak. Tamajungbai na tsübudaktsü dang, ne Sannükeri na metetba ama na tanga kecha majurutsü. Ne Sannükeri kodang aser kong nai timtem ajurutsü Pai shidak meteta lir. Tammangtiba lenden nung Pai Pa temeim sayutsü ta ne mulung ajunga agi amangang.

Pastor tem yaritsü atema 'Beyond The Walls' mapatong tenzük

January 31, 2021: Alima nung tenzükogo.

mapang shia tayongzükba balala ajangshiba mapang nung nübur ajak ayimjemtsü atema pastor temi asalentong tasen apiteta inyaktsü nüngdaker, ibayongji pastor temi kaket zülua adokba nung yaritsü atema "Beyond the Walls With Books" mapatong tenzükogo.

2020 küm tetenzüklen coronavirus wara prokba mapang pastor tem atema tayongzükba tulutibaji pei santem mesütsü atema liasü; yamaji Arogo aikati online aser social media ajanga sayutsüngiba den tekülem sentong agiba yoka liasü, aser pastor karibo kaket zülü tenzuka liasü.

The Christian Post indang book publishing division- Vide Press-ia kaket züluner pastor pastor temi <https://www.videpress.com/> ajanga metetpelatsü akok, ta Vide Press-i metetdaksü.

Vide Press nung Director, Tom Freiling-i tesüiba küm 25 dak tema pastor tem aser Arogo lenirtem den inyaksema arur; yamaji pa leniba nung iba project tenzükogo.

Talisa Vide Press-i tamang jenjang, teimla, tesendaktep yanglushiba, kiyimba, kibong, timtem mapang tesünep, tetsübu aser tejashi madak takok anguba dak sendakba kaket zülur pastor tem ajungmesor. Wara mapang aser yimtenren den loktiliba nung mepetmesü aliba mapang nung pastor temi kaket zülua adoktsüla, kechiyong nüburtemi ochi nüngdaker, ta Vide Press-i metetdaksü.

Item ama kaket zülua ministry mapa inyaktsü jangrar pastor temi <https://www.videpress.com/> ajanga metetpelatsü akok, ta Vide Press-i metetdaksü.



Bhopal nung Khristan temi anti-conversion özüng anema longkak aitba noksa nung angur.

OLONG PAITEP # 5711

[illegible]

<u>TIPIEN</u>		<u>LANGTSÜNGLEN</u>	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5710 TELANGZÜBA


TIPILEN : 1. Yimlibilem, 4. Anak, 5. Tangar, 7. Aya, 8. Arong, 11. Par, 13. Lemjem, 14. Oagi, 15. Mulung.	LANGTSÜNGLEN : 1. Yongya, 2. Moko, 3. Marok, 5. Teronem, 6. Nung, 8. Amajok, 9. Jangzü, 10. belem, 12. Rong.
--	---



2021 JANUARY ITA LILI RESULT !

January ita nung Lili tajungtiba (First) shimteta tanü yangi lephsia agütsür. Lili zülur-i February 10, 2021 tashi nung Tir Yimyim Office nungi senpet agizüksü mepishia metetdaksür.

TESAYURI ALOKBA DANG ALGEBRA SAYUR :



Tesayur : Iba ya Mr. Alokba i langzüang- A=B,aser B=C, tetezü A=C ta khuli sayur, süra iba mesükba tatishitsü ka shiang.

Alokba : Very simple sir, ni na meimer, nai nü jala meimer, tetezü ni nür jala meimer ta ati!

Tesayur : Oh Alokba!!

Lilir : WhatsApp

TANÜBO NAI LANGZÜANG

Q. Avalokana Software ya _____ den sendaktepa lir.

A.Food **B.Government Fund**

C.Health **D.Entertainment**

===== (Taruba adok nung onoki langzüsü)

YASHI ADOK TELANGZÜBA : Singapore

Tanur asoba anogo nung salem osang den noksa
angati adokdaksünūra - Tenüŋg, Küm, School,
Talidak & salem osang tejangja zülür, noksa
(photograph - any size) ka den anogo 3 mesüra 4
jelia e-mail : tiriyimjim@gmail.com nung yokang
mesüra Tir Yimjim bureau tem nung agüjang.

Tepela Tasoba Anogo



1. Tenüŋ :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

FEBRUARY ITA TONGTIBANG ANOGO KAR: 2021

February 01	- Indian Coast Guard Day
February 2	- World Wetlands Day
February 4	- World Cancer Day, International Day of Human Fraternity
February 6	- International Day of Zero Tolerance to Female Genital Mutilation
February 7	- International Safer Internet Day
February 10	- World Pulses Day
February 11	- International Day of Women and Girls in Science
February 13	- World Radio Day
February 14	- Valentine's Day
February 20	- World Day of Social Justice, (3rd Saturday) World Pangolin Day
February 21	- International Mother Language Day
February 27	- World NGO Day
February 28	- National Science Day

SUDOKU # 5752

					6	7			4	7	6	5	2	8	1	9	3
1	2			8			4	5	2	8	1	7	9	3	4	5	6
4	7			3				9	9	3	5	1	4	6	8	2	7
7	8	9	1	2	3				7	9	8	6	5	2	3	1	4
3		2		6	5	1	9	7	1	5	4	8	3	9	6	7	2
		1		9	4	8	3	2	6	2	3	4	1	7	5	8	9
5						9	7		8	4	2	9	6	5	7	3	1
	1	7			8	4			5	6	9	3	7	1	2	4	8
		8		7		3			3	1	7	2	8	4	9	6	5

TELANGZUBA # 5751

OJANG LUTEP # 5299

EMMEDER	:	
ERAS	:	
ÜKCHTSIR	:	
TEMEMET	:	
SHIDJAANG	:	
JAAK	:	
NDE	:	
TCHSÜKITEP	:	
AAMEN	:	
NZSEÜ	:	

OJANG LUTEP TELANGZÜBA # 5298

**TAJUNG AJAK PEI INDANG KÜMA PENZÜR TEKA TAZÜNG
KIDANGI SHILANG**

TAN HOPTA ATEMA - KOMA SÜLA ?

Q. Nagaland nung COVID-19 vaccine ya taginür ajak nem angati agütsü nunga koma süla ?

Olong 20 shi nung February 05, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) aianqa yokang. Telangzübatemji taruba Honibarnü adoktsütsü.



January 31, 2021 nü West Bengal kübok Howrah district nung aliba Domurjala Stadium nung election nüboyim sentong ka nung Union Minister Smriti Irani, party General Secretary Kailash Vijayvargiya, Uttar Pradesh Deputy CM, Keshav Prasad Maurya aser taoba mapang TMC lenirtem- Rajib Banerjee aser Suvendu Adhikari nunger tangokba noksa nung angur.

2022 tashi nungbo tanur ajak nem shisaliok agütsütsü: Harsh Vardhan

New Delhi, Aenjeti/January 31 (Agencies): Union Health & Family Welfare Minister, Harsh Vardhan-i, 2022 küm tashi nungbo linük nung tanur ajak nem shisaliok, healthcare aser chiyungtsü tajung agütsütsü aser tetsür ajak kümzüka ayutsü, ibaji Ato kilonser, Narendra Modi nükjidong lir, ta metetdaksü.

Honibarnü British Association of Physicians of Indian Origin (Wales) senden nung Minister-i India linüki coronavirus wara nokdangba tsütsü takok anguba indang metetdaksü.

"Iba wara prok tenzüka mapang nung mongin aikati India nunga iba tashidak ajanga takoksa angutsü, ta meteta liasü. Onoki meranga inyakba ajanga alima nung iba tashidak agi shiranger shilem timba

India tasenba nung tanur ajak nem shisaliok tajung den anema-alibaren aser nutritional facility tajung agütsütsü aser tetsür ajak kümzüka ayutsü. India nung linük meimba aser meimchir temeim dang alitsü. Iba ya Ato kilonser mangdang lir," ta Vardhan-i ashi.

British Association of Physicians of Indian Origin (Wales) senden nung Minister-i India linüki coronavirus wara nokdangba tsütsü takok anguba indang metetdaksü.

"Iba wara prok tenzüka mapang nung mongin aikati India nunga iba tashidak ajanga takoksa angutsü, ta meteta liasü. Onoki meranga inyakba ajanga alima nung iba tashidak agi shiranger shilem timba

anepba aser shilem ishiba asüba linükji onok lir. Tang linük nung coronavirus tashidak agi teshirangdakpur 1,70,000 den tajemba lir," ta pai metetdakja liasü.

Coronavirus vaccine yanglutetba atema linük nung scientist tem nem tenüsang agüja pai, "Mapang shidak nung scientist temi linük nung vaccine ana yanglutetogo. Alima nung vaccination drive tulutibaji linük nung agidar; mezüngbuba anogo 15 nung nisung lakh 37 nem iba vaccine agütsüogo," ta pai metetdaksü.

Health Ministry-i ashiba agi, January 30 nü kija nunga aonung 7:00 ako tashi nung nisung 2,06,130 nem coronavirus vaccine agütsüogo.

Aluyimertem pusema Amarinder Singh-i party ajak senden ayonger

Chandigarh/New Delhi, January 31 (Agencies): Amongnü Congress lenir aser Punjab Chief Minister, Amarinder Singh-i, state nungi aluyimertem dak Delhi police-i azüker, iba denji külemi Delhi arrtsülen nisung tamajungertemi aluyimertem dak azüker, ta aitsü.

Aluyimertem pusema aluyimba ozüng asemprong agientsü atema takhangba agüja Mongolbarnü (February 2) Amarinder Singh-i state nung party ajak senden ka

ayongzüko.

Amongnü state sorkar sangdong ka ajanga ashiba agi, February 2 nü sendenji anüngdang 11:00 ako nungi Punjab Bhawan nung amentsü.

"Tang mapang ya pei atema bilemtsü mapang ka masü saka asen state aser asen nüburtem atema asenok longjemtsü mapang ka lir," ta chief minister-i party balala dang ashi.

Sorkar sangdong nung shia aliba agi, senden nungji Delhi arrtsülen aluyimertem longkak aitba tesem nung tensa raksaba

asir Singhu arrtsü nung aluyimertem anema inyakba atema onüktem benoka jembitsü.

Aluyimertem pusemtsü aser Punjab state atema party ajak iba senden nung dendaktsüner, ta Amarinder Singh-i party ajak dang mepishia metetdaksü.

"Punjabi nunger ajak aser state nung yimtenren party ajak longjemba ajangadang iba tebilemtsü koktettsü aser aluyimertem kümzüka yutettsü," ta pai metetdaksü.

Telangana nung tesayur ka Covid vaccine agiba sülen asü

New Delhi, January 31 (Agencies): Telangana nung tawa Anganwadi tesayur ka coronavirus vaccine agiba sülen healthcare centre ka nung süogo, ajisüaka la asübaji vaccine agiba den sendaktepa mali, ta health department nungi ketdangser kati metetdaksü.

Arrshi küm 55 tantsür, Susheela January 19 nü coronavirus vaccine agiba sülen la Nizam's Institute of Medical Sciences nung treatment tagidak mapang la temang ano tamajungba küma Honibarnü (January 30) süogo.

Mancheria District Medical & Health Officer (DMHO), Dr. M Neeraja-i, "La High Blood Pressure agi mapang talangka nungi shiranga liasü aser la dak tepokpok timtem-a liasü. La asübaji vaccine agiba ajanga masü ta onoki bilemer," ta metetdaksü.

La temang ano tamajungba

akümba sülen anogo ana tejaklen la Nizam's Institute of Medical Sciences-i anir oa liasü.

Ano tanga osang ka nung Telangana Health Minister, E Rajender-i, healthworkers aikati coronavirus vaccine agitsü tsübur, anungji parnok melung lemdaktsütsü atema state sorkari telok ka tenteta maparen inyaksü, ta metetdaksü.

Amongnü Covid-19 vaccine dak sendakba sentong ka nung jembidang Telangana State Federation of Chambers of Commerce & Trade (TSFCCT), Rajender-i, iba vaccine indang olulu kanga prokba agi nisung karibo vaccine agitsü tsübur, ta ashi.

"Nisungtemi tasü aittsü nüngdak. Nüburtem marendaktsü atema ni-a iba vaccine agiogo. Tanü tashi nung iba vaccine magir health workers shilem 25-30 shi lir," ta paisa metetdaksü.



Ahmedabad, January 31, 2021: Amongnü Ahmedabad nung aliba Civil Hospital nung tetsür police ka coronavirus vaccine agidang tangokba noksa nung angur.

Mamata-i tamakok anguba agi TMC lenirtem BJP dangi meyipier: Amit Shah

New Delhi, January 31 (Agencies): Amongnü Union Home Minister, Amit Shah-i West Bengal Chief Minister, Mamata Banerjee aija, lai West Bengal nüburtem dang nangzüka ama meinyakba agi tanübo Trinamool Congress (TMC) lenirtemi party toktsür Bharatiya Janata Party (BJP) nung adener, ta ashi.

Amit Shah-i, "Kechiba TMC lenir aikati BJP nung adener, ta Mamata Banerjee-i shisadangtsüla. Ibaji, lai state nüburtem dang nangzüka ama meinyakba agi lir. Election atongba mapang nungbo la kija dang anüngtsü," ta ashi.

TMC lenir pongui Delhi nung Union Home Minister ajurua BJP nung adenba sülen Union Minister-i TMC tongti, Mamata aitsür.

Taoba mapang TMC lenirtem- Rajib Banerjee, Baishali Dalmiya, Prabir Ghoshal, Rathin Chakraborti aser Rudranil Ghosh nungeri Honibarnü BJP nung denogo.

"Parnok party nung adenba ajanga BJP-i Sonar Bangla atema inyakba tashi taitba akümtsü," ta Amit Shah-isa

metetdaksü. Amongnü anepdang video-conferencing ajanga Howrah (West Bengal) nung election nüboyim sentong ka nung jembidang-a Shah-i, Mamata Banerjee-i state nung lar adianu chir atema inyaker, aser state assembly election atongdangba la kija anüngtsü, ta ashi.

"Election tembangba sülen state nung BJP-i sorkar akümtsü. Modi sorkari nübur tenzüksü atema inyaker, saka Mamata sorkari Bengal nung lar kinünger ka atema inyaker," ta ashi.

Paisa, "Ni ya züngbong nangzüker, West Bengal nung BJP sorkari mezüngbuba cabinet senden nung state nung sensaker ajak nem Ayushman Bharat Yojana tajangzüak agütsütsü atema telemtetba agitsü," ta metetdaksü.

Tesüiba ita ishika tsüngda TMC lenirtem aikati Mamata Banerjee-i aniba party toktsür BJP nung denogo; parnok rongnung taoba mapang West Bengal Minister Suvendu Adhikari densema lir.

Menden 294 aliba Bengal Assembly election ya April-May nung agitsü.



New Delhi, January 31, 2021: Amongnü New Delhi nung Ghazipur arrtsülen aluyimertemi linük wako amer aluyimba ozüng tasen asem anema longkak aitba noksa nung angur.

Russia nung Navalny bukuma longkak aiter 1,000 dak tema apu



Opposition lenir Alexei Navalny apuba mechi Vladivostok, Russia nung longkak ater tetsür ka police-i apuba noksa nung angur. Russia nungertem Deobarnü longkak aitba nung shilem magidaktsütsü mechi Prosecutor General indang office ajanga state communication watchdog, Roskomnadzor dang longkak aitba nung shilem agitsü jembiba call tem block sütsütsü totuyuba agütsü.

Moscow, Aenjeti/January 31 (Agencies): Kremlin anemer Alexei Navalny tepuokdak ayuba anema Deobarnü Moscow aser Russia tesem balala nung longkak aiter nisung 1,000 dak tema police-i apu aser longkak aitba tesem nungi senshidaktsü, shirnok temokong arema aser aputsü metsüpu nokdaka liasü.

Tir Vladimir Putin anemer tejangja, Navalny pua aliba chioktsü asoshi Kremlin nem takhangba agüja taoba hopta tatemlen longkak aitba sülen maneni January 31, 2021 nüa linük tesem ajungalen rally ayongzük.

Taoba küm meyi mapang Russia nung miim mozü amshiba atema Germany nung temang anepalua munger January 17 nü Moscow-i meyipa shilangba mapang opposition politician ya pua liasü. Putin-i pa tepsettsü totuyuba agütsü, ta pai tai tongloksür, saka Kremlin-i magizüker.

Moscow nung police jenti liaka rer agi labanger alidak anepdang 9:00 ako (par mapang) meta rally tenzü aser iba mapang police temi nisung 100 shi apu, ta osangbeneri ashi.

Ajak senteper linük nung police temi nisung 1,009 puogo, ta longkak aitba asadanger telok, OVID-Info ajanga ashi.

Longkak aitba ya ozüing alema lir, kechiaser parnok nem temelaba magütsü aser senshidaktsütsü, ta police-i ashi. Yamai longkak aitba ajanga COVID-19 tashidak tali prokshitsü, ta ketdangsürtemi ashir.

Police temi Moscow nung senzüsemponger nokdangba aser metro station tem shibangba mechi rally ayongertemi anaben tashi tesem melenshiba sülen longkak aiter tem tesem balala nung adenshia liasü.

Moscow nung longkak aiter nisung 300 shi liasü, ta police temi ashi.

Linük anüdoklen Vladivostok yimti nunga longkak aiter tem yimti tiyongi aittsü aliba police temi nokdak aser iba yongji parnok tzü temokong agi müketbanger aliba Amur Bay nung adenshi.

Longkak aiter tem teka amteper temperature -13 Celsius (8.6 Fahrenheit) aidak rer nung jaja aser parnoki "Putin ya auer" ta ayimtena liasü. Iba

yimti nung police temi nisung 100 dak tema apu, ta OVD-Info ajanga ashi.

Siberia kübok Tomsk yimti nunga concert hall ka jakdang longkak aiter tem adenshia "Pa chiokang" ta ayimtena liasü. Taoba küm August ita Navalny-i iba yimti semdang aoba mapang tayimtsü nung nisung memeteti akum.

Siberia anüdoklen Yakutsk yimti nung temperature -42 C (-44 F) liaka nisung kar adenshia liasü.

Hopta tetenzüklen Navalny tembar tejangja aika dak tenük yoker apuba sülen iba longkak aitba ya pa atema tetendangba ka liasü. Pa tenu Oleg densema nisung jenti house arrest nung lir.

"Asenok ola madoki lira, asüing asenok mashika atema parnok arutsü," ta Navalny kinungtsü Yulia Navalnaya-i Instagram nung zülutsü.

Arishi küm 44 tain Navalny ya khen atema tepuokdak nungi chiokba maparen nung aibelena lir, ta tai tongloksür. Taruba hopta court kati pa nem küm asem ser tesadang tepuokdak ayutsü temerenshi agütsütsü atema jembitsü lir.

Nobel Peace Prize nominee nung Thunberg densema lir



Oslo, Aenjeti/January 31 (Agencies): Taküm Nobel Peace Prize atema nominate süa alirtem rongnung Russia sorkar anemer Alexie Navalny, World Health Organization aser climate campaigner Greta Thunberg nungertem densema lir aser parnok ajak ya Norwegian ozüing yanglurtemi busemer, shirnoki takok angurtem shimteta aruba otsü lir.

Alima tesem ajunga nung parliament züngsemtem nungi tenzüka taoba mapang iba konang narokum nguteter tem tashi-i candidate benoktsü temsüa liasü. Deobarnü shibangba nominations nung Nobel committee nungi teyari magütsü.

2014 küm nungi tenzüka 2019 dak alaka küm shia takok angurtem ya Norwegian ozüing yanglurtemi shimteta arur, ta Henrik Urdal, Director of the Peace Research Institute Oslo ajanga ashi.

Saka iba sempet shiba nem agütsütsü ta telemtetba agir, Norwegian Nobel Committee-ibo tang tashi nominations indang jembiba mali, kechiaser parnoki item tenüing ya küm 50 tashi temai madoki miimshia arur.

Nominee nung Thunberg, Navalny, WHO aser makamait linüktem atema COVID-19 mozü timti agütsütsü asoshi inyaktepba COVAX programme tem densema lir, ta

Reuters ajanga Norwegian ozüingyanglur den survey ka agiba nung jangjatet.

Tzü-mopung menenba anema raraba nung yakbang sür ola adoker rongnung Thunberg ya ka lir, ta ashir. Lai tentetba campaign telok, Fridays for Future ya iba sempet atema shimogka lir.

Russia ya yimjung nung democracy lima ka kumdaktsütsü atema meranga nokdakba atema Navalny ya Russian academics temi shimet aser pa tenüing ya Norway nung taoba minister Ola Elvestuen-ia benoka liasü.

Belarus nung timi election agitsü atema nokdaker aser yimjung nung sorkar anema nokdaker activist Sviatlana Tsikhanouskaya, Maria Kolesnikova aser Veronika Tsepkalo nungertem tenünga benoka lir.

Maneni US nung amenoka aliba Committee to Protect Journalists; taoba mapang Charlie Hebdo osangbener Zineb el Rhazoui; news website Hong Kong Free Press, U.S. nung amenoka aliba International Fact-Checking Network aser Paris nung amenoka aliba Reporters without Borders (RSF) tema densema lir.

2021 Nobel Pace Prize angurtem osang ya October ita sangdongtsü.

WHO team-i Wuhan nung shishilembadak semdang



World Health Organization team nung züngsemtemi Wuhan, China nung aliba Huanan Seafood Market asemnü buba semdang dang tangokba noksa ka yangi angur. Coronavirus ya iba market nung arem shiruru ayikdak tesem nungi adok, ta scientist temi temolung melemi bilemer. Iba market ya timbaka shibangogo saka WHO team nungi researcher temi virus prokshia aoba indang asadangtsü.

Beijing, Aenjeti/January 31 (Agencies): WHO nungi mongintem team kati Deobarnü Wuhan nung shishilembadak ka semdangogo, kong küm ka

tejakdang mezüingbuba coronavirus tashidak poteta liasü.

WHO nungi team züngsemtem Huanan seafood

market-i ao, koba taoba küm January ita nungi shibanger lir, ta AFP osangbener kati ashi.

Shiruru nungi kodaser nisung dak tashidak menalok, iba

indang bushitsüngdang nükjidong nung parnok China-i oa lir. Iba bushitsüngdang maparen achaayanga inyaktüsü atema China-i menokdaktsüba sülen tang maparen tenzüko.

Ajisüaka World Health Organization ketdangsertemi ashiba agi, mesen poktetba tera jangjatsü atema kangabo mimlar, koba ajanga alima nung nisung million ana dak tema tepsetba den alima rongsenketsüing nung kanga mejungi kongshio.

Mapang talangka nungi sentong yanglur aliba nung shilem ka ama Deobarnü WHO team Huanan shishilembadaki ao, koba China nung ketdangsürtemi kanga kümdanga meita atadar.

Mongintem tasüngdangba tem kecha telangzüba magütsü aser security temi shishilembadak kima osangbener adenshia alirtem

dang iba tesem toktsür aotsü asoshi ashi. Noksa tangoker ka noksa tajungba agitsü atema apu ka nung soketa tur mena aliba dena anokshi aludaktsü.

Iba hopta tetenzüklen state media outlet Global Times sangdong ka ajanga Huanan shishilembadak ya mesen poktetdak teyongtsü masü ta shiogo. Bushitsüngdang sülen iba shishilembadak nungi tashidak potet masü ta ngutetba metetdakja liasü.

China nung ketdangsertemi parnoki mapang shidak nung jenjang tapet agiba ajanga coronavirus tashidak kanga jung azüoktetogo ta shia arudar. Alima ajunga rongsenketsüing nung timtem adoker aliba mapang China-bo rongsenketsüing jenjang taoba mapang ama kümogo aser tashidak agi asüra 4,636 dang lir.

Ukraine-i tenokdangba agüjaka Russia-i Sputnik V Vaccine agütsür

Moscow, Aenjeti/January 31 (Agencies): Kyiv-i tenokdangba agütsür liaka Russia-i, Ukraine anütoklen telungpurtemi atsünger aliba Donetsk tesem nung Sputnik V COVID-19 vaccine agütsü tenzükogo, ta local news outlet ka ajanga Deobarnü metetdaksü.

February ita nungi tenzuka anüolen linük nung yanguba vaccine angutsü Ukraine sorkari imlar aser parnoki Russia indang Sputnik V vaccine amshitsü atema tenokdangba agütsüogo.

Ajisüaka Russia arrtsü nung aliba Donetsk tesem nung parnoki kecha minyakteter,

kong Ukraine sepai aser Moscow-i teyari agütsüba separatist rebels na tsüngda mangatetep adokba sülen 2014 küm nungi tang tashi nung nisung 13,000 dak tema süogo.

Parnok mulungka nung sangdongba Donetsk republic tekolakba Denis Pushilin-i, vaccine agütsü yakta tenzüksü aser Russia-i mozü agütsüba atema pelar, ta ashiba news agency DAN-i sangdong ka ajanga metetdaksü.

"Vaccine dose meyrejang ishika agütsüogo. Iba mesüka mozütem maneni ngua alitsü. Russia-i lenla ajak nung onok nungita yariba atema kanga

pelar," ta pai ashi.

Ajisüaka koba institution-i vaccine agütsür iba indang osang tejangja mali.

Honibarnü Sputnik vaccine bendangleni yokba telok; Russian Direct Investment Fund (RDIF)-i, parnoki Donetsk mesera Luhansk nem vaccine magütsü, ta shiogo.

Pushilin-i ashiba agi, vaccine angati agi mezüing agizüksüpurtem rongnung health workers aser tesayurtem densema lir, ta ashi.

DAN sangdong dak sendakba nung Kyiv mesera Moscow sorkari kecha telangzüba agüja mali.

Tata Motors-i limited edition Tiago saya



New Delhi, Aenjeti/January 31, 2021 (Agencies): India shishilembadak, Tata Motors-i limited edition Tiago sayaogo. Iba gari jenjang sen lakh 5.79 (ex-showroom Delhi) alitsü. XT variant nung ajemdaker yangluba Tiago Limited Edition ya manual transmission den single-tone sentsü asem - Flame

Red, Pearlescent White aser Daytona Grey nung angutsü.

Tanga feature tsütsü reprangdangra, Tiago edition tasenba nung 14-inch Bold Black Alloy Wheels, Harman meyong 5-inch Touchscreen Infotainment, koba Navimaps ajanga 3D Navigation support asütsü, Reverse Parking Sensor

den Display, Voice Command Recognition, Image & Video Playback aser Rear Parcel Shelf inoksema yanglutsüogo.

"2016 küm iba variant sayaba mapang nungi, segment nung Tiago ya takok ngua arudar aser iba den külemi gari ya ajaki sapur. Iba takok nung anidaka, product indang BS6 version ya 2020 küm saya aser iba mapang GNCAP ajanga 4 star safety rating agütsü aser segment nung safety aketba gari ka ama sangdong. Tanü tashi Tiago customer lakh 3.25 lir aser shishilembadak-a gari ajanga telangzüba tajung jenti nguogo. Tang, iba limited edition ajanga shishilembadak customer tem takhangba peridaksütsü onoki imlaa atar," ta gari sayaba mapang, Vivek Srivatsa - Head - Marketing, Passenger Vehicles Business Unit, Tata Motors-i ashi.

Realme X7 5G variant ana nung angutsü akok

New Delhi, Aenjeti/January 31, 2021 (Agencies): February 04 nü Realme X7 sayatsü aliba anogo ishika tejakdang, iba smartphone indang jenjang metetdaksüogo. Taoba mapang, company-i Realme X7 Pro den külemi regular model sayatsü osang jangjatsüogo, saka iba smartphone jenjang magütsü lir.

Phone anaprongla yagi 5G support asütsü aser quad rear camera angutsü, koba China nungbo yokdar. Vanilla Realme X7 smartphone ya tanga shishilembadak talisa Taiwan aser Thailand nunga yokdaki.

Twitter sabang ajanga tipster Debayan Roy - @Gadgetsdata-i, India nung Realme X7 - 6GB + 128GB storage option jenjang sen 19,999 aser 8GB + 128GB storage option jenjang sen 21,999 alitsü. China nungbo Realme X7 - 6GB + 128GB storage variant jenjang CNY 1,799 (sen 20,400) aser 8GB + 128GB storage model jenjang CNY 2,399 (sen 27,200) lir. Company ajanga agütsüba ama phone jenjang ya meshira, shishilembadak, Realme X7



yagi Xiaomi Mi 10i aser OnePlus Nord den tokteptsü, koba India nung nüngtugu mid-budget smartphone ana alitsü.

India nung Realme X7 aser X7 Pro smartphone anaprongla Flipkart aser Realme online den offline sabang ajanga angutsü.

Vanilla Realme X7 nung 6.4-inch full-HD+ (1,080x2,400 pixels) AMOLED display aser Realme X7 Pro nung 6.55-inch full-HD+ AMOLED display den 120Hz refresh rate keta lir. Phone anaprongla yagi dual-SIM cards support asütsü aser Android 10 out-of-the-box ajanga achaayangtsür. Realme X7 nung octa-core Dimensity 800U SoC aser Pro variant nungbo octa-core Dimensity 1000+ SoC inoktsüogo.

Smartphone anaprongla

nung camera configuration kasa shi angutsü, saka Pro variant tera agi tajungba asütsü. Handset tesülen quad camera setup inoka yanglutsüogo, kong 64-megapixel primary camera den f/1.8 aperture, 8-megapixel ultra-wide-angle camera den f/2.3 aperture, 2-megapixel macro camera den f/2.4 aperture aser 2-megapixel camera den f/2.4 aperture keta aliba angutsü. Selfie jangrar aser video calling atema, smartphone tejaklen hole-punch cutout nung 32-megapixel front camera inokja lir. Tanga feature tsütsü reprangdangra, Realme X7 aser Realme X7 Pro SIM cards anaprongla nung 5G, 4G LTE, dual-band Wi-Fi, Bluetooth v5.1, GPS aser tanga aika angutsü.

Maneni, Realme X7 nung 4,300mAh battery den 65W fast charging aser Realme X7 Pro nungbo battery tuluba - 4,500mAh angutsü, saka X7 ama 65W fast charging keta lir. Smartphone anaprongla nung charging atema USB Type-C port inoktsüogo.

ASLB SANGDONG

Shirnoksa taoba Luchii 4, 2020 anogo PGDT atema Viva-Voce agütsüogo temsüa alirtem takoker osang Tsüklai, 3, 2021 anogo sangdongtsü akok.

I Temjen Tzüdir Secretary, ASLB-AC

AR-i Join Armed Forces campaign ayongzüik



Dimapur, Aenjeti/January 31, 2021 (TYO): IGAR (North) kübok Jalukie Battalion indang Assam Rifles-i January 21, 2021 nü nungi tenzuka January 30, 2021 tashi campaign sentong ayongzüik. Lisopurtem Armed Forces nung adentsü ajungmesotsü nükjidong yur iba campaign agi, ta sangdong ajanga metetdaksü.

Tening nung Assam Rifles indang Troops-i Tening Sub-sector nung yimtsüng ajunga semdang aser Armed Forces nung adentsü asoshi lanurtem ajungshia liasü. Iba campaign

agiba mapang, Army aser Assam Rifles nung adentsü atema entry scheme den külemi tanurtem atema Sainik School nung azüngtsü inyakyimtem metetdaksütsü asoshi maparen balala achaayanga agiogo. Ano külen, Rangapahar, Dimapur nung aruya aliba recruitment rally atema temsüa alir candidate indang document bendenogo.

Lisopurtem atema bilemja Join Armed forces campaign ayongzüiksüba atema yimertemi Assam Rifles dang pelaba metetdaksüogo.

'Shotgun Wedding' atema Armie melen Josh aniok



Los Angeles, Aenjeti/January 31, 2021 (Agencies): Kentener aser actress Jennifer Lopez-i tongti shilem agitsü aliba 'Shotgun Wedding' nung Armie Hammer melen America nunger actor Josh Duhamel aniokogo.

Sangdong ka ajanga angazükba agi, tan ita tetenzüklen Hammer-i iba film nung shilem magitsü lemtetba sülen, arishi küm 48 tain Josh aniok. Iba project dak sendakba nung Hammer melen Josh Duhamel-i shilem agitsü jembia liasü.

Hammer ya tim masüba maparen nung dena lir ta pa aitsuba osang dak sendakba nung pa iba project nungi agien. Social media account 'House of Effie' nung message kar meima prokba sülen, arishi küm 34 tain actor-i iba film nung shilem magitsü lemtet.

Ajisüaka, Hammer-i pa anema tai apuba ajak tiyazü ta shiogo aser pai, "Ni anema tiyazü kuli agüja aitsüba tem ni magizüiker, saka iba ama tejashi tia ka nung tanur pezü yutsür Dominican Republic nung film tangoktsü atema ni memulunger," ta ashi.

"Lionsgate-i ni pusemer aser iba atema parnok danga ni pelar," ta Hammer-i shisem.

Iba movie atema Production otongdar sangdong ka ajanga angazükba agi, 'Shotgun

Wedding' film maparen dak sendakba nung, Armie-i iba film nung shilem magitsü asoshi onok dang mepishiogo aser onoki pa tebilemba nung pusemer."

'Shotgun Wedding', koba Lopez aser Ryan Reynolds nati produce asütsü, iba film ya Dominican Republic nung February 22 nü nungi tangok tenzüksü.

Iba film ya romantic comedy alitsü, kong Tom aser Darcy (Duhamel aser Lopez) nati tena kibong akümtsü atema kinungertem longjemdaksütsü asoshi sentong yanglur, saka tenati yangluba sentong nung timtem adoker.

Mark Hammer aser Liz Meriwether nati züluba screenplay nung ajemdaker Jason Moore-i iba film direct asütsü. Kasa mapang film ya Lopez, Reynolds, Elaine Goldsmith-Thomas aser Benny Medina nunger den külemi Mandeville indang Todd Lieberman aser David Hoberman nati produce asütsü.

2020 küm sayaba 'The Lost Husband' aser 'Think Like a Dog' sülen 'Shotgun Wedding' ya Duhamel indang project tasenba lir. Taoba küm, Duhamel-i comedy film 'Buddy Games' mezüing direct asü.

Ano külen, Jennifer Lopez-ia 'Hustlers' aser 'Second Act' film nung tesüsa shilem agiogo.



Brazil club Palmeiras nungi asayartem Copa Libertadores final akokba sülen takok marok bener pelatepba noksa nung angur. Rio de Janeiro kübok Maracana stadium nung final asayaba mapang parnoki Santos goal 1-0 agi koka liasü.

Pakistan-i South Africa T20s atema Hafeez aser Fakhar meshim

Lahor, Aenjeti/January 31 (Agencies): Tawa kanga junga asayaa aliba batsman Mohammad Hafeez aser opener Fakhar Zaman na taruba ita South Africa den asayatsü aliba asayamung atema Deobarnü sangdongba squad nung züngoksema mali.

Arishi küm 40 tain hafeez tang kanga junga asayadar aser pai taoba Twenty20 internationals 12 nung run 502 yanglua lir.

Ajisüaka chief selector Mohammad Waseem-i ashiba agi, pa iba asayamung nung shilem magitetsü.

"Hafeez' asayaba yimya dak sendakba nung kecha ashishitsü mali, saka February 3 nü team bio-secure environment kati aiba tashi nung pa mazüngtsü," ta Waseem-i asayar sangdongba mapang ashi.

Hafeez tang Abu Dhabi

nung T10 league nung shilem agidar, koba February 6 nü tembangtsü.

Pakistan aser South Africa na February 11, 13 aser 14 nü Twenty20 asaya asem Lahor nung dang asayatsü.

Waseem-i ashiba agi, tang asayaba yimya aser taküm India nung Twenty20 World Cup asayatsü aliba dak raangloker asayartem shim.

Zaman tawa junga masayateti arudar aser pai taoba asaya 10 nung run 97 dang yanglua lir. Pa dak Covid-19 tashidak potetba sülen December ita New Zealand nung Twenty20 asayamung nunga masayatet

Babar Azam lenisüba kübok team asayatsü, kong pacer Hasan Ali, all-rounder Aamer Yamin aser batsman Asif Ali nung densema lir.

Leg-spinner Zahid Mahmood, all-rounder Amad Butt aser batsman Danish Aziz nungera squad nung züngoksemogo aser kasa mapang nung pacer Wahab Riaz meshim.

Pakistan aser South Africa na tang Test asayadar aser Pakistan-i mezüngbuba test wicket tenet agi koker lir.

Tanabuba Test Rawalpindi nung Brehostibarnü tenzüksü.

Squad: Babar Azam (captain), Haider Ali, Khushdil Shah, Hussian Talat, Danish Aziz, Asif Ali, Iftikhar Ahmed, Mohammad Nawaz, Zafar Gohar, Faheem Ashraf, Aamer Yamin, Amad Butt, Mohammad Rizwan, Sarfaraz Ahmed, Shaheen Shah Afridi, Haris Rauf, Mohammad Hussain, Hasan Ali, Usman Qadir, Zahid Mahmood.

BCCI-i IPL 2021 India nung ayongzüka asayatsü

Mumbai, Aenjeti/January 31 (Agencies): Mushtaq Ali T20 asayamung takok ngua ayongzüka asayaba sülen BCCI-i, February aser March ita nung Vijay Hazare asayamung aser tetsürtem atema one-day asayamung ka ayongzüka asayatsü sentong yangludar aser iba sülen April ita Indian Premier League (IPL) ayonga asayatsü.

BCCI-i, 14buba IPL kidang ayongzüka asayatsü aser parnoki asayamung atema Wankhede, Brabourne Stadiums, DY Patil Stadium, Navi Mumbai nung Reliance Cricket Stadium aser Pune tezülen Maharashtra Cricket Association (MCA) Stadium shimdanga lir.

Motera Ahmedabad nung state-of-the-art Sardar Patel Stadium-a shimdanga lir, kong knockout asayatem ayongzüka asayatsü imlar.

Küm 87 tsüngda tang

mezüngbuba BCCI tang mezüngbuba Ranji Trophy masayatsü asoshi telemtetba agiogo aser iba melen Vijay Hazare Trophy aser tetsürtem atema one-day asayamung ka ayongzüka asayatsü telemtetba agiogo. Kasa mapang nung India aser England na tsüngda Test pezü, T20I pongu aser ODI asem asayatsü.

IPL-2021 April ita tanabuba hopta nung tenzüksü imlar, koba April 11 aser 14 tsüngda asütsü aser June 6 nü tashi nung tembangtsü.

Iba mapang nung IPL nung franchise tasen ka bendenloksü atema BCCI-i auction ayongzüka agitsü. General body-i franchises tasen ana bendenloksü atema agizükogo, ajisüaka taküm atema ka dang bendenloka atatsü asoshi telemtetba agiogo, koba ajanga tarutsü nung team ter ayokba ajanga board-i sen timba aazüktsü.

Sourav Ganguly mozüki nungi yokogo



BCCI President Sourav Ganguly, mozüki toktsür kidangi aoba mapang fan tem dak teka ayiploksüba noksa nung angur.

Aenjeti/January 31, 2021

(Agencies): BCCI tir Sourav Ganguly mozüki nungi yokogo, kong pa coronary arteries mesademi aliba merektetsü atema angioplasty tanaben agishia liasü. Pa yakta taoba mapang ama temang junga akümtsü, ta pa anepaluba doctor-i ashi.

Angioplasty agiba sülen Ganguly temang tajungba aküm, saka doctor temi pa temang Hokolbarnü tendangogo aser pa critical care unit nungi nija takdang kati anir ao. Pa mozükidang anogo pezü amungba sülen Deobar anepdang kidangiogo.

Taoba India cricket team captain ya Bodhbarnü teku nung tashiba ka adokba sülen

Apollo mozüki-i anir ao.

Cardiologist Devi Shetty-i Gangluy temang tendangba report asadangba den mozükidang pa temang anepalua aliba doctor den tongtepratepba sülen angioplasty agitsü atema telemtetba agi.

Hopta asem tejakdang Ganguly par kidang exercise agiba mapang teku nung tashiba ka adoka liasü. Iba sülen coronary arteries asem tashi nokdang aliba potet aser tanga mozüki ka nung coronary artery tachichilen stent implant asü.

Brehostibarnü West Bengal Chief Minister Mamata Banerjee-i mozükidang Ganguly semdangogo.

Tai Tzu aser Anders nati BWF World Tour Final kokogo

Bangkok, Aenjeti/January 31 (Agencies): World Tour Final tetsür kija asaya final nung top-ranked Tai Tzu-ying-i reigning Olympic champion Carolina Marin koka hopta asem tsüngda asayamung asem atonga akoktsü aliba nokdangogo.

Marin-i arishi küm 26 tain Taiwan tsürla ya taoba Thailand Open tournament final ana atonga kokogo.

Deobarnü final asaya tetenzük nung Marin-i junga masayatet aser Tai-i la defence majangba maongka agia liasü ajisüaka asaya tatemi lai junga asayateta mezüngbuba game 21-14 agi akok.

Tanabuba game tetenzük nungi Tai-i asaya amokbanger

asaya aser 21-8 agi asaya akok. Decider nung asayar ana tsünga kanga toktepa asaya saka asaya tatemi drop shots tajung ana asayaba sülen Tai-i 21-19 agi asaya akok.

Kasa asayamung tebur kija final asaya nung Anders Antonsen-i Viktor Axelsen akok. Axelsen-i hopta asem tsüngda asayamung tasembuba akoktsü aliba Anders-i sot.

Mezügbuba game nung Axelsen-i pa asaya yimya mazüoktet 16-21 agi makok ajisüaka tanabuba asaya nung pai asendenshir asaya aser 21-5 agi akok.

Ajisüaka decider nung Antonsen-i kanga junga asayatet aser 21-17 agi Axelsen madak takok angu. Tena

tsüngda ghonda ka asayaa liasü.

Hopta asem tsüngda Antonsen-i dang Axelsen koktetogo.

Tetsür tarep asaya final nung Korea tsür tarep ana asaya. Jenjang pezüba nung aliba tarep Lee So-hee aser Shin Seung-chan nati Kim So-yeong aser Kong Hee-yong na koka liasü. Mezüngbuba game Kim o Kong nati 15-21 agi akok ajisüaka tanungba game ana Lee aser Shin nati 15-21 aser 26-24 agi akok.

Tebur tarep asaya nung Taiwan nung Lee Yang aser Wang Chi-Lin nati 21-17, 23-21 agi Indonesia nung Mohammad Ahsan aser Hendra Setiawan na kokogo.



Manipur, January 31: Manipur kübok Shangshak nung yimtsüng tem tsüngda friendly soccer match ka asayaba mapang goalkeeper-i ball nokdangtsü merangba noksa nung angu. Shangshak yimtsüng nung alirtem anogo ka tsüngda team yanglur iba asaya nung shilem agia liasü. Parnok timbaka asaya metenzük tsüngda kidang rong tepa liasü, koba yimtsü nung inyakyim tasen ka masü.

BILEMDANGANG

"Sensaksem ajak nung telangzüba agütsüba ajanga na shisataka mekümdaktsür."